

ARMEN PETROSYAN. The Indo-European and Ancient Near Eastern Sources of the Armenian Epic. Journal of Indo-European Studies Monograph № 42. Washington, Institute for the Study of Man, 2002. 236 p.

АРМЕН ПЕТРОСЯН. Армянский эпос и мифология. Ереван, 2002, 240 с.

Այս գիրքը, տպված անգլերեն և ռուսերեն տարբերակներով, ինքնատիպ ամփոփումն է Արմեն Պետրոսյանի՝ Հայ և Համեմատական առասպելաբանության և էպոսագիտության վերաբերյալ նախորդ աշխատանքների, միաժամանակ նոր մակարդակի մի ինքնուրույն հետազոտություն է: Հայոց Հին և միջնադարյան վեպերը՝ «Վիպասանք», «Պարսից պատերազմ», «Տարոնի պատերազմ» և «Սասնա ծռեր», Հայագիտության մեջ վաղուց են արժանացել բանագիտական և բանասիրական մակարդակով պատշաճ հետազոտությունների ու հրատարակումների: Իսկ Հեղինակը ինդերն մոտեցել է այլ ճանապարհով և հետազոտական այլ մեթոդներով: Նրա նպատակն է Հայ վիպական ավանդության վաղնջագույն առասպելաբանական արմատների բացահայտումը, որն իրականացվել է Հայագիտության մեջ աննախընթաց լայն ընդգրկումով ու խորությամբ:

Համեմատական քննությունների համար Հեղինակի համար առաջին հերթին հիմք է ծառայել տեղագրական-աշխարհագրական գործոնը՝ այն միջավայրը, որին առնչվել և որի սահմաններում են կատարվել վիպական հերոսների արարքները: Այս համատեքստում էական է Հայկական լեռնաշխարհի հարավի և հարավ-արևմուտքի դերը, հատկապես՝ Տիգրիսի և Եփրատի վերին հոսանքների շրջանները, որոնք առասպելների կենտրոնացման կարևոր վայրեր են և Հին մերձավորարևելյան, և հայկական ավանդություններում: Այստեղ տեղայնացած Հին միջագետքյան, ասորական և հայկական առասպելների համադրությունն է Հեղինակին հնարավորություն տվել ձևակերպելու իր Հայ-միջագետքյան, Հայ-հնդեվրոպական և հնդեվրոպական-միջա-

գետքյան կապերի վերաբերյալ դրույթները:

Աշխատությունը բաժանված է վեց գլուխների, որոնցից առաջին չորսում քննվում են Հայոց Հին ու նոր վեպերի կերպարների, սյուժեների և մոտիվների առասպելաբանական նախահիմքերը, որոնց համար Հեղինակը հնդեվրոպական և Հին մերձավորարևելյան զուգահեռներ է բերում: Վերջին երկու գլխում քննության են առնվում առասպելի և պատմության փոխհարաբերությունները, մասնավորապես վիպական կերպարների պատմական նախատիպերը և Հայոց ազգածագման ու նախապատմության խնդիրները:

Համառոտակի անդրադառնանք աշխատության բովանդակությանը, ըստ առանձին գլուխների:

1. Հայ վիպական ավանդության ամենավաղնջական շերտը թերևս սրբազան երկվորյակների (Նաև եռվորյակների) առասպելներն են, որոնցով, իբրև հիմնադիր նախնիների, սկզբնավորվում են Հայոց բոլոր Հին վեպերը: Հայոց երկվորյակային առասպելներում Հեղինակն իրավամբ տեսնում է Հին աշխարհի երկու հիմնական հայեցակետերի անդրադարձումները՝ հնդեվրոպական և Հինարևելյան, կապված համապատասխանաբար ձիուց և ցլից սերված հերոսների հետ: Այս հիմքի վրա բացահայտվում են մի շարք ընդհանրություններ Հայկական Երվանդ-Երվազ, Սանասար-Բաղդասար, հնդկական Ինդրա-Ագնի, խուռական Թեշուր-Թաշմիշու երկվորյակային զույգերի միջև, որոնցից առաջիններն ամպրոպային աստվածություններ են: Բացահայտվում է ամպրոպային աստծու առասպելների կարևորագույն գերը Հայոց վեպերում, բերվում է Հայոց Վահագն աստծու Հիմնի հետ համադրելի մի շումերական բնագիր,

խոսվում է հայկական վեպի վրա հնարավոր միտանական ազդեցություն, ինքնական Պիրվա աստծու և նրա պաշտամունքի վայրերում տեղայնացած Հայոց հերոսների ընդհանրությունների մասին և այլն:

2. Իր նախորդ ուսումնասիրություններում Ա. Պետրոսյանը վերականգնել էր «սևի և սպիտակի հակադրության առասպելը», մարմնավորված *rēmo- և *Harg'- արմատներով, որի առավել բացահայտ օրինակը Պարաշուրամայի և Արջունայի հակադրությունն է հնդկական ավանդության մեջ: Գրքի երկրորդ գլուխը նվիրված է այս առասպելության հայկական դրսևորումների համեմատական քննությանը, հատկապես Հայոց երկրորդ անվանադիր նախնի Արամի՝ *rēmo-ից ծագելու և Արամի ու Հայկի (առաջին նախնու) ամպրոպային աստվածություններ լինելու խնդիրներին: Սա համահունչ է տակավին մ.թ.ա. III հազարամյակից Հայկական լեռնաշխարհի հարավից և Հյուսիսային Միջագետքից ավանդված Ar(a)m- հիմքով ցեղատեղանուններին և հին սեմական տիեզերաբանական պատկերացումներում «մթություն» երկրի ու լեռան տեղայնացմանն այդ շրջանում: Հայկը և Արամը դիտվում են որպես խոռոհարարական Թեշուր-Թեշեբայի հայկական համապատասխանություններ: Վերջինս, որի անունը ստուգաբանվում է հնդեվրոպական *tek's- «կացին» արմատով, որպես «կացնավոր», նույնացվում է հունական առասպելաբանության Թեսևսին (Հմմտ. Թեսևսի կապը լաբրինթոսի հետ, կապված labrys «կրկնակի կացին» արմատին):

Քննելով Արծրունի իշխանական տան նախնու լեգենդը, որը պատմվել է Մեծ Զարգետի վերին հոսանքում, Ա. Պետրոսյանը հանգում է այն հետևություն, որ այստեղ արծվի հիշատակությունը (հին Հայ. արծուի *rg'ipiyō-, Հմմտ. *Harg' «սպիտակ, փայլուն. արծաթ», «արագ») համասլատասխանում է շումերական առասպելական Անզու թռչունի մի առասպելին, տեղայնացած Մեծ և Փոքր Զարգետների ավազանում՝ Զարու երկրում: Ընդ որում Անզուի ku.babbar «արծաթ» մակդիրն էլ համապատասխանում է արծվի հնդեվրոպական անվանն ու առասպելություն (որի մի դրսևորումն էլ ի

Հայտ է գալիս Ռիգվեդայում), որը պետք է բացատրվի մ.թ.ա. IV հազարամյակից Հայկական լեռնաշխարհի հարավային շրջանները շումերական ազդեցության տակ գտնվելու հանգամանքով:

3. Երրորդ գլուխը վերաբերում է «մեռնող և հառնող» հերոսներին: Հայոց վեպերն ավարտվում են «վերջին» հերոսներով՝ «մեռնող» աստվածությունների վիպականացած կերպարներով: Նրանցից առաջինը՝ ազգածին ավանդության Արա Գեղեցիկը համադրվում է հնդեվրոպական համահունչ դիցանունների, հատկապես խեթ. Ar(a)s-ին (ըստ Գ. Ղափանցյանի): Արա Գեղեցիկի նախատիպ Արամանեակի անունը հանգեցվում է հնդեվրոպական *aryomen-ին (Հմմտ. հնդ. Արյաման դիցանունը), բաղադրված Արամի հետ: Հետաքրքիր է քաղական էա-իշխար-ի բնույթը և Հայոց Հայկ-Աստղիկ-Արամայակ դիցաբանական եռյակների համադրությունը, ապա և Հայոց «մեռնող և հառնող» Արա Գեղեցիկի և նրա զուգորդ պամիլոլացի էրի կապը միջագետքյան էրրա աստծու հետ: Առավել ուշադրով է Հայ վիպական հերոսների հակառակորդների կերպարների և անունների համեմատական քննությունը: Ի Հայտ է գալիս *Hner- և *danu- արմատներով կողմավորվող երկու տոհմերի հակադրության առասպելը, ուր երկրորդի առաջնորդը հաճախ կոչվում է սեմական b' դիցանվան հետ համադրելի անուններով՝ Հայ. Բել, հուն. Բելոս, հնդ. Բալի:

4. Հեղինակն իրավամբ դտնում է, որ հայկական բոլոր վիպաշարերը բնութագրվում են կերպարների մեկ միասնական համալիրով, ձևավորված որպես ծննդաբանական շարք: Այս շարքը դիտվում է որպես երկնային աստծու երկվորյակ որդիների և նրանցից մեկի՝ ամպրոպի աստծու ու նրա մեռնող որդու առասպելների համադրություն: Հայկական շարքերն առավել մոտ են Հռոմի առաջին արքաների շարքին, ընդ որում, և՛ անուններով, և՛ կերպարների գործառույթային բաշխմամբ՝ ըստ Ժ. Դյումենզիլի «եռաֆունկցիոնալ գաղափարախոսություն»:

Ուշադրով են հայասական, ուրարտական և Հայ նախաքրիստոնեական դիցա-

րանների աստվածների առնչությունների բացահայտումները: Այսպես. Հայկական լեռնաշխարհի հարավում կենտրոնացած ուրարտական դիցարանն իր եռամաս կառուցվածքով համադրելի է հնդեվրոպական եռամաս դիցարանների ժ. Դյումեզիլի մեկնաբանության հետ, ընդ որում, մեծ աստվածների եռյակի գեթ երկուսի անունները հնդեվրոպական են (Թեյշեբա < *tek's-, ըստ Հեդինակի և Շիվինի < խեթ. Šiu-ni «աստված, արևի աստված», ըստ Վ. Իվանովի և Ի. Դյակոնովի): Այս աստվածները պահպանվել են «Սասնա ծռեր» էպոսի հերոսների կերպարներում: Արևմուտքի Բարձր Հայք նահանգի, համահայկական պետական պաշտամունքի արժանացած աստվածները շարունակում են տեղի հնագույն թագավորության՝ Հայասայի աստվածների կերպարները, որոնք իրանական դարաշրջանում վերանվանվել են իրանական անուններով: Հյուսիսի հին աստվածները անհայտնվել են որպես Հայոց ազգածին ավանդության հերոսներ:

5. Հիմնականում արաբական տիրապետության արդյունք հանդիսացող «Սասնա ծռերի» առաջին հերոսների ասորեստանյան դարաշրջանից եկող անունների հիման վրա այն արդարացի եզրակացությունն է արվում, որ այդ ճյուղի սեմական տարրերը հասնում են Ասորեստանի և Ուրարտուի հակադրության դարաշրջանը: Էպոսի հնագույն տարբերակի անուններն այդ տարածքների հնագույն ցեղերի էպոնիմներն են (Սանասարի որդի Մուշը և Արամի կուսակալ Մշակը մուշկերի էպոնիմներն են): «Սասնա ծռերի» գլխավոր հերոս Դավիթը, ըստ Մ. Աբեղյանի դասական ուսումնասիրության, հին տարբերակի Մուշեղն է, «Պարսից պատերազմ» և «Տարոնի պատերազմ» վեպերի մեծ հերոսը: Այս անունը կապված է խեթական Մուրսիլի անվանը, և Ա. Պետրոսյանը համադրում է այս հերոսի առասպելությունը լիդիայի առասպելական արքա Մյուրսիլոսի, ապա և Մուրսիլի անունը կրող խեթական պատմական արքաների ժամանակների իրողությունների հետ: Անկախ որոշ համադրությունների թեակառությունից, այս վերակազմությունները նոր լույս են սփռում Դավիթի կերպարի հին

արմատների բացահայտման վրա և նոր խոսք են հայագիտության մեջ: Գիտության մեջ նոր խոսք է նաև «Իլիականի» և Սասուն-Տարոն տարածաշրջանի վիպական ավանդության մեջ առկա անունների և մոտիվների ընդհանրությունների, ինչպես օրինակ Տրոյա և Տարոն անունների համադրությունը:

6. Քննության են առնվում Հայոց և տարածաշրջանի այլ հին ժողովուրդների ազգածագման ու նախապատմության հարցերն ըստ Հայ վիպաառասպելաբանական ավանդության տվյալների: Հայոց առաջին նախնի Հայկը և նրա ժառանգները, որոնց անուններով են կոչվել Հայաստանը, նրա լեռները, գետերը, իշխանական տոհմերը, ապա և ամիսների ու օրերի անունները, համարվում են Հայոց հնագույն աստվածների վիպականացած կերպարներ: Այդ հերոսների շարքն ավարտվում է վերջին աստվածային նահապետ, «մեռնող և հառնող» աստվածություն Արա Գեղեցկի մահով: Ազգածին ավանդությունը ներկայացնում է «արարչադործության առասպելի» վիպականացած տարբերակը: Միևնույն առասպելաբանական մոդելն է կրկնօրինակվում Հայ ավանդության հետագա վիպաշարերում:

Հայոց նախնի Արամի և նրա Հաջորդ Մշակի և արամեացիների էպոնիմ Արամի ու նրա Հաջորդ Մուսքի անունների համեմատությամբ հիմնավորվում է նրանց միևնույն առասպելաբանական հիմքից ծագած լինելու տեսակետը: Արամ անունն ի հայտ է գալիս նաև քարթվելական և հյուսիսարևմտակովկասյան լեզուներում, որ պետք է փոխառված լինի Հայկականից:

Առաջադրվում և քննվում է Հայոց ազգածագման չորս վարկած, որոնց համաձայն Հայ ցեղանվան հիմք են համարվում շումերական աղբյուրներում պահպանված Հայաստանի հարավային շրջանների HA.A ցեղատեղանունը, խեթական այբուբենի Hayaša թագավորության անվանումը, խեթերի ծագումով նախախեթական Hatti ցեղանունը և ուրարտական աղբյուրների Etiu (Etiö) ցեղատեղանունը: Հայկի և նրա երեք որդիների առասպելները համադրվում են իրանական և գերմանական (ըստ Տակիտո-

սի) Համապատասխան լեզբենդներին, որի հետևանքով բացահայտվում են նաև անվանական զուգահեռներ: Այդ երեք որդիներից երկուսը Հայերի՝ Արամանյակ և խուռինների՝ Նոոն էպոնիմներն են, իսկ երրորդը՝ Մանավազ, թերևս ուրարտացիների բազարկված իրանական նմանահունչ մի անվան հետ: Ուրարտական դիցարանի և արքաների անունների քննության հիման վրա հավանական է համարվում Ուրարտուի իշխող տարրի հնաբալկանյան «թրակափոյուզական» ծագումը:

Մենագրության մեջ առաջ է բերվում հսկայաքանակ համեմատական նյութ հնդեվրոպական և Հին մերձավորարևելյան ավանդություններից, որոնց հիման վրա հայկական առասպելները և վեպերը ներմուծվում են հնդեվրոպական և Հին մերձավորարևելյան ուսումնասիրությունների ոլորտը: Գրքի հիմնական թերությունն այն է, որ հեղինակը, երբեմն չափազանց տարվելով համեմատաբանությամբ, ճիշտ գտնված եզրերն ու հիմնավորումները խճողում է ավելորդ երկրորդական, երրորդական փաստերով և հեռանում առանցքային խնդրից, որի հետևանքով առողջ միջուկը կորչում է համեմատական հսկա նյութի

տակ: Այս կարգի թերությունները, հարկավ, թուլացնում են շարադրանքի տպավորությունը, սակայն բնավ չեն նսեմացնում աշխատության արժեքը: Կատարված է մեծ ու արդյունավետ հետազոտություն, ուր առաջին անգամ լայնքով ու խորությամբ միջազգային գիտության մեջ շրջանառության են դրվում Հայ բազմադարյան վիպական ավանդության գրեթե բոլոր կարևոր հուշարձանները և դրանց անվանաբանական, սյուժետային, մոտիվային հիմնական փաստերը, քննության առնված համեմատական լայն տեսադաշտի վրա: Այդ քննություններին, որոշ վերապահումներով հանդերձ, հիմնականում պարզվել են մի շարք լեզվական, էթնիկական և մշակութային փոխառնչություններ, որոնք առկա են եղել Հայկական լեռնաշխարհի հարավում և Հյուսիսային Միջագետքում մ.թ.ա. III-1 հազարամյակներում: Դրանով բացահայտվում է Հայ վիպական ավանդության պատմամշակութային բացառիկ նշանակությունը Հայերի և հնդեվրոպական ու մերձավորարևելյան Հին ժողովուրդների հնագույն պատմության և մշակույթների ուսումնասիրության գործում:

ՍԱՐԳԻՍ ՀԱՐՈՒԹՅՈՒՆՅԱՆ